

名宦名臣傳

卷六



卷六

八旗通志初集卷之一百九十六

名臣列傳五十六

正白旗漢軍名宦大臣一

馬國柱

夏一鶚

王國安

胡文華

金光祖

華善

石琳

石文晟

石文炳

于時躍

李士正

宜思恭



楊文乾

宜恩恭

白文融

于排鞞

白世

白文昂

金光時

華善

王國安

賄文華

馬國柱

夏一謙

五日... 萬曆...

古... 萬曆...

八... 萬曆...



馬國柱。漢軍正白旗人。世居遼陽。天命六年。大
兵取遼陽。始隸旗籍。天聰十年。設立內三院。國
柱以通曉漢文。在弘文院辦事。崇德元年。考察
名列二等。

賜全戶牛二。驢一。三年七月。更定六部官制。以國柱為

工部理事官。旋陞都察院左僉都御史。順治元
年七月。加右副都御史銜。巡撫山西。十一月。疏
報官兵破流賊於汾州。斬二千餘級。獲馬千餘
匹。追至青龍永寧黃河一帶。賊倉卒投河死者

無算。又獲馬五百餘匹。進抵平陽。賊棄城遁走。山西全省悉平。二年閏六月。偕宣大總督李鑑。勦平嵐縣土賊。十月。加兵部右侍郎。總督宣大山西等處。四年七月。調補江南江西河南等處總督。時南方初定。山賊竊據者多。國柱勦撫並施。五年二月。疏報恢復無爲州。斬賊首馮洪圖等。并獲降賊州同李穀沆。十一月。奏報廣賊李成棟。妄稱惠國公。始踞南雄。繼勾連洞蠻。號稱百萬。直犯贛城。臣咨會巡撫劉武元。併檄總兵胡有陞等。大破之。成棟單騎走。斬首萬餘級。俘獲無算。十二月。疏報副將楊捷等。恢復都昌縣城。生獲賊渠僞尚書余應桂。六年六月。疏報南贛餘孽。擁故明宗室朱由植作亂。遣官兵討平之。十一月。疏言江南既改京爲省。國學應改爲府學。即其舊址而新之。仍支學田租銀。以供春秋祀事。章下。所司議如所請。七年三月。加太子太保。九年七月。疏報江閩官兵會勦大覺岩賊。陣斬僞總兵李金等數十人。降僞總兵盧毓瑞。

等十餘人。生擒渠魁張自盛。斬獲殆盡。十年四月。疏報建昌營都司鄭德陣擒偽都督陳文魁。等於南豐。中軍參將陳陞陣擒偽都督宋朝宗。等於樂安。偽伯金簡臣等於寧都。十一年正月。奏海賊分艘入犯。崇明內江靖江泰興等地方。即檄飭蘇州總兵官王璟等擊敗之。三月。奏報逆賊賴龍等盤踞桂東。出沒江楚。臣移咨楚撫分兵會剿。直搗賊巢。擒賴龍等。桂東平。是年九月。以年力衰老乞致仕。康熙三年卒。五月。

予祭葬如典禮。國柱初任山西巡撫時。值大兵進征。流賊事平。後人民如出湯火。閭井荒涼。國柱加意撫綏。流亡旋集。民甚德之。國柱既沒。山西士民公請崇祀名宦祠。

夏一鶚。漢軍正白旗人。由貢生出身。屢陞江南江寧府知府。及江西分守道。順治八年。授江西巡撫。時江西初定。政多穢濁。土地荒蕪。一鶚到任。叅劾貪吏二十餘員。吏治澄肅。清查錢糧。戶口招集流亡。開墾荒地。給還官產。安插明朝廢

宗期年。政務具舉。明翰林傅鼎銓等受僞唐王職。聚衆爲亂。往來福建江西。一鶚調兵分路夾擊。追至福建。斬級萬餘。生擒鼎銓。并僞總兵楊起龍等一百八十三員。九僊山賊首陳九思。宜黃賊首曾明等。負固山寨。出沒爲寇。各縣時時告急。一鶚勦撫兼用。分地設防。賊黨先後就戮。

卒後康熙十七年崇祀江西名宦祠。

王國安字磐石。號康侯。漢軍正白旗人。世居奉天蓋州。曾祖以上仕明。世襲錦衣衛千戶。天命

六年。遼東入版圖。始隸旗籍。祖正任都司。以孝行聞。父顯宗任陝西長武遊擊。能和輯兵民。以疾乞休。秦人祠祀之。國安兄弟十人。皆貴仕國。安行第三。生而英敏。好學。年十五。即補博士弟子員。因雲貴叛亂。旗兵進勦。

詔停止八旗科目。遂入國子監爲官學生。精習

國書。旋授刑部筆帖式。以勤敏稱職。考選弘文院辦事中書舍人。康熙六年。轉撰文中書舍人。陞國史院典籍。中書舍人。向無任纂修官者。國安

以文學知名特充

三朝實錄纂修官九年改內三院爲內閣國安仍爲內

閣典籍兼光祿寺少卿十一年

世祖章皇帝實錄告成議叙

賜蟒衣加一級食俸十二年陞刑部員外郎仍留內閣

充纂修

太祖高皇帝

太宗文皇帝兩朝實錄官時吳逆蠢動大學士莫洛往

經畧川陝奏請國安佐軍務他大學士等具疏

留之是年冬十二月

特旨補授內閣侍讀學士專典史事十六年冊立

皇后禮成偕侍衛阿爾尼

頒詔朝鮮咨訪朝鮮累代世系及習俗風土山川形勢

勒爲一書十八年充明史館提調官二十一年

六月陞內閣學士兼禮部侍郎充明史副總裁

官是秋

特簡爲浙江巡撫時耿逆甫平浙江切近閩疆蹂躪之

餘官私凋敝且海氛未靖盜賊橫行胥吏舞文

豪猾梗化重爲民患國安清吏治明軍令鋤暴
安良戢兵除盜草州縣無名科派及一切弊政
又念浙省重務莫如鹽漕康熙十八年後運弁
與縣胥因緣爲奸苛索糧戶貼費漕船每多稽
悞因立限冬收冬兌民困以蘇嘉湖兩郡例徵
白糧九萬五千有奇額外復徵銀四萬三千餘
兩爲轉運費康熙三年巡撫朱昌祚建請抽漕
船六十二隻併增置新船六十四隻起運永除
加徵之弊甲寅兵興白糧改徵折色其船棄而

弗用歲久盡朽至是三逆蕩平仍徵白糧本色
運至京倉而僱船募役諸費一無所出議復加
徵民甚苦之國安疏言浙江白糧全徵本色起
運需船一百二十六隻向係漕船抽運自康熙
十五年改徵折色抽運之船年滿朽爛後又奉
文節省停造新船以致船隻逐年積缺現在起
運漕船止一千八十隻無可抽運若照從前僱
募民船勢必年年加派苦累窮民請照康熙三
年例將免徵白糧經費銀三萬四千二百五十

餘兩暫徵一年。購買堅固船隻充入漕幫。抽選運白庶倉儲不致遲悞。而民間永免派徵。戶部議再行該督確議奉

特旨。此案已經會同總督具題。爾部復駁令督撫會議。殊爲不合。其即議結以聞。於是部臣覆奏如國安所請行江南諸省。並援此例。歲減民間苛派數十萬兩。至於鹺政舊例。江浙諸商易地行鹽。其間盤馱掣驗。官受其利而商甚不便。國安咨會江南巡撫及兩省鹽院。力行更調。各歸本省。又松

江沿海六場。雖地屬江南。而牢盆壑蕩等課。反輸浙省。舊時江浙竈戶俱納課於場。由場解司胥吏侵蝕。遞爲奸利。官收竈解。巧立名色。婪詐百端。正課一兩有加。派至十餘兩者。國安嚴飭所司一準徵收地丁之例。自封投櫃。官收官解。歲省竈戶雜費亦數十萬兩。又修築紹興之西江塘。建三江閘。山陰會稽蕭山諸暨四縣廢田。悉爲膏壤。初浙江以用兵故。多設防汛。既而承平無事。旗兵驕橫。鈎連郡中。無賴以稱貸爲餌。

子母相權。寅生卯長。不暮月積。至數倍。没入貧民田廬。子女不可勝計。民間謠云。舊有債帥。今若帥債國安。先懲無賴子。剪其爪牙。然後坐會議堂。與將軍都統協心。調劑明正。旗兵之罪。悉寘之法。勒石城闈。永行禁絕。錢塘江風濤險惡。舟人倚豪猾勢。佔據渡口。爲利每一舟載滿百人。始離岸。及至中流。輟棹索錢。稍不如意。輒辱詈毆。擊又重載。覆舟民多溺死。而舟人以善泅獨無恙。國安知其弊。捕得首惡。嚴治之。限令每舟止許載三十人。人出錢五文。凡渡舟若干。編諸冊。以次受載。無敢違法。由是全活者甚衆。杭城舊多火災。國安聞報。即飛騎往拯。被災之家。賞卹備至。復命闢火道。具水車立賞格。以募勇夫。人人盡力。其患遂息。國安爲人彊力。精於吏職。所部十一郡。吏民賢不肖。及姦邪罪名。皆知之。郡縣各有記籍。摘伏如神。常晨坐堂皇。官屬以次晉謁。延見鄉三老。問民疾苦。甫闔扉。人謂退食之暇。判牘不遑。國安乃屏騶從。微服行闈。

闡間。或棹小舟。深山邃谷。無不徧^涉。有不逞者。須臾縛至幕府。郭內外大驚。姦民悚息。又嘗遠行。經三衢。涉甬東。抵東甌。赤城。凡瀕海邊界。無不躬履。相度機宜。繪圖詳酌。如杭嘉寧紹溫台等府。前此界外棄地。悉登版籍。永豁包賠之累。舟山僻處大洋。

廷議欲遷其民於內地。人情皇皇。國安抗疏。陳其不便。

詔如所陳。民得各保故業。今移定海縣治於此。遂成樂

土嘗奉

命修浙江通志。延聘夙儒碩學。給膏火。備廩餼。開局於貢院。公餘親往校閱。尤重學校。培養士習。增鄉試號舍。至一萬二千間。士子便之。平時勸課農桑。驅逐游惰。開擴瀕海疆域。俾細民獲收漁利。所以厚浙人之生者甚備。他若旌表孝子忠臣。貞女烈婦。常恐後時。除耗羨。省徭役。革行戶承值。懲關吏苛征。下至弁丁輿隸。屠僧庖福。苟倚權力為把持者。皆一切禁絕。二十三年二月。陞

浙江總督兼兵部右侍郎駐衢州。先是杭州城外有支河可引入城以通舟楫。自清河閘抵江干約三十餘里。歲久淤塞。國安欲浚之。籌畫已定。旋奉移節之。

命未獲舉行。悉以所繪圖移送代者。屬其殫力疏濬。今之長河橫亘。扁舟往來。皆國安所規度也。衢州三面俯江。國安始至。即捐已貲。建浮橋以代渡。舟民無病涉。會福建總督施維翰赴任。卒於途。奉

特旨以國安往代。而衢州總督不復設。初耿精忠之亂。總督李之芳由杭州進兵。征閩。駐衢州。事平。仍撤歸省。會施維翰繼任。以衢州爲閩豫甌括極衝。請移駐其地。以故征閩將士復自杭州隨總督來衢。至是裁缺。報至國安。甫在閩。操將士慮兵隨標去。紛紛叩轅。號訴勢不可遏。國安恐倉猝生變。諭令各歸營伍。隨具疏言。標兵從前効命裹瘡浴血。家室靡寧。一旦裁去。恐有不便。請併留衢州副將營。月給糧餉如故。俟浙省撫鎮

各營將備兵丁缺出以次充補。疏再上始獲
俞允。人情大安。初至福州。苦旱受事之日。甘霖立沛。八
即乍離兵革。民力已殫。城郭井邑。倉儲學校。皆
未建立。濱海遺孽。尚有存者。國安次第規畫。悉
有條理。閩省初設將軍駐防。兵無定所。假民舍
以居。國安疏請就耿逆立營舊地。別置營房。分
撥防汛。釋免耿逆部下遊士匠役八百餘人。使
各歸農。前任總督姚啟聖進勦澎臺。一切征儲
軍械。爲費浩繁。文籍漂沉。無由稽覈。國安據實

奏聞。并移咨各部院。凡係閩省軍幕錢糧簿牘。俱
別繕寫。馳咨本布政司。條分縷析。

奏請銷案。定權關則例。止稅興販。大洋重載。餘俱
豁免。是時海禁始開。琉球國遣使納貢。例有副
貢。以餽督撫等衙門。國安謂非柔遠之道。一無
所受。并戒諸屬僚。毋得染指。副貢遂絕。二十四年
大計年。文計屆期。國安採訪確實。忽一日。傳道府悉
至內署。焚香設誓。令各疏所見。司道以下相顧
聘。眙具以實對。事既神速。夤緣之弊盡絕。先是

聖祖仁皇帝軫念八閩。

特詔蠲免積年逋賦。國安豫刊告示數千紙。標硃蓋篆。部文一至。立命諭通省士庶。俾貪吏不得婪征。欺隱。其後藩庫虧帑。違例私徵。事覺。

特旨遣內閣學士郭世隆赴閩按問。知國安前事始大。歎服。以濱海郡邑尤宜隆重儒術。徧諭所屬。各立義學。捐俸擇師。以誨童蒙。又立共學書院於省會。前後所上章疏。如安棟歸降。分防水陸。酌定通省營制。籌畫澎臺郡縣。建置城垣。設立學。

校接濟澎臺兵餉。招集濱海流亡。陳調度兵馬之方。定更番戍卒之制。皆一一見諸施行。二十六年內陞刑部右侍郎。閩人感國安惠政。涕泗。遮留動以萬計。又以國安清苦。釀金贈行。國安堅不受。閩人爲築却金亭。道過浙江。民人羅拜。歡呼數百里。不絕。肖其像祀之於吳山書院。在刑部二年。獄多平反。二十八年六月。奉天府尹缺。

特命國安以刑部左侍郎兼蒞其任。且

諭

曰盛京根本要地頃遇天旱本處產米有限兼多外省人雜處以致價昂爾可清查驅令各回原籍又彼地旗民土田相錯爾其定立疆界毋致混淆盛京錢糧爲數無多前府尹欲令旗人地畝亦輸納銀兩所見其小可盡實徵米豆爾其酌行之其邊塞一帶亦多外省人民作何驅逐稽查此等事雖責在將軍爾宜協同料理國安抵任後逐一奉行時部議遣官清查馬廠官地因地畝繁多驟難清丈稟欲加增糧額國安力爭不可仍多遣屬員分頭清丈各

立封記遂得其平初

盛京刑部審理訟獄無會同地方有司之例細民偏受刑拷冤濫非辜國安

奏請凡旗民案牘一準各省成例與有司會審由是稱便

盛京糧儲甚寡必藉外省移粟接濟國安請行海運格於部議三十二年三十三年連歲遇旱

聖祖憶海運之議乃遣內務府郎中陶岱赴山東會同藩司發倉穀四萬石

命盛京戶部侍郎阿喇密航海赴登州。協運至三岔口。

又

命國安由陸路督運。散賑八城二府九州縣兵民。國安計運穀四萬。不若運米二萬之易。且既至三岔口。距留都尚遠。賑荒如救焚。必待運至都城。始復分散轉運。勢已無及。宜即在三岔口分發八城。其應運至奉天者。獨就海口以車受載。經費既省。輓運倍速。定議以聞。報可。於是不日而事集。饑民獲濟。高麗歲歉。國安奉

詔轉粟遼海以賑卹之。亦如期至彼地。三十四年十一月丁繼母盧氏憂。同事大僚。謀具疏請令在任守制。國安固謝之。乃止。三十七年冬。服闋。再補奉天府尹。四十二年。

聖祖書清慎勤三字匾額。并臨米海岳瑞雪詩一幅。賜之。四十六年六月。陞兵部右侍郎。四十七年戊子二月。轉左侍郎。三月。

召赴暢春園。賜宴較射。

聖祖顧謂諸皇子曰。王國安朕之老臣。昔年曾歷任督

撫辦事稱職。朕甚信之。每奏事。常令越次近。

御

榻密對。或稱爲王侍郎而不名。四十八年。奉使至陝。

西祭告軒轅黃帝暨周文武成康等一十三陵。

六月疾作。卒於涇陽驛。年六十有八。奉天軍民。

聞之。流涕設祭。羣請崇祀名宦祠。

本朝奉天尹祠名宦者。自國安始。浙江福建所在。

爲立祠。國安沉厚警敏。平居不妄言笑。遇事皆。

有權畧。處之裕如。性孝友。事親盡禮。闔門千指。

五世同爨。俸祿有餘。輒以分給族黨。未嘗私置。

田宅。尤好引掖後進。單門素胄。苟有片長。必稱。

譽之。所著有閣中集。浙閩封事。留都封事。並翻。

譯明心寶鑑。貞觀政要。古文必讀諸書。藏於家。

子以巽。仕至內閣學士兼禮部侍郎。

胡文華。字德耀。漢軍正白旗人。初任直隸昌平。

州。累陞府道。順治十二年十二月。陞山東按察。

使。時兵燹後。土寇牽連。積案如山。甫半載。完。

欽案百餘件。冤抑俱伸。遷廣西布政。順治十七年。巡撫。

南贛。卒於官。

賜祭墓。崇祀山東名宦祠。

金光祖漢軍正白旗人。初任佐領。補吏部郎中。旋又兼管叅領。順治十八年。陞福建右布政使。康熙元年。轉廣西左布政使。三年。陞廣西巡撫。九年。

聖祖仁皇帝特簡爲兩廣總督。十三年。廣西將軍孫延齡叛。陷梧州。光祖會集水陸四路官兵往勦。斬殺甚多。賊遁。復梧州。賊兵犯懷集縣。及欽州。光祖遣官兵擊懷集賊衆。六戰皆捷。又遣遊擊王

嘉賢擊敗欽州賊衆。是年七月。丁父憂。

特命在任守制。十四年。賊復犯懷集縣。遣守備李如貴等督兵擊之。危城全獲。并遣官兵恢復藤縣。十六年。海寇楊彥迪犯欽州。遣遊擊劉士貴、高應臣、薛保等擊敗之。先是高雷總兵官祖澤清降吳逆。既而反正。至十七年復叛。奉

命同平南王尚之信等勦之。十八年九月。擒澤清。粵西地瘠民貧。叛賊復多加派。光祖通行禁止。復具疏

題請將額征銀兩。每銀一兩。收米一石。支給官兵。俟事平後。照舊徵銀。民甚便之。十九年。同揚威大將軍簡親王喇布。分路勦叛將馬成蔭。敗之於武宣。復縣城。粵東自平南靖南兩藩駐兵三十餘年。凡府州縣市廛行業。俱被諸藩下官役佔踞。按貨取利。光祖力爲禁止。且移咨藩府。委曲開諭。革除舊弊。粵東土狹人稠。穀不足供。所食。粵西藉糶。穀取銀。以供常賦。彼此相需。從前蠹胥藩棍把持。有埠頭船票等費。光祖痛加禁諭。凡穀石出入。聽商民自行交易。船載不用照驗。復於沿河設立汛哨。以防土寇劫掠。民甚賴焉。又加意學校。振起人文。通檄所屬。凡文廟之傾頽者。悉令以時脩葺。學宮煥然一新。士子稱頌不置。二十年。

王師進剿雲南。光祖同征南大將軍賴塔等。統兵至西隆州。擊敗偽將軍何繼祖兵。奪石門坎。復安籠所。所向皆捷。直抵雲南城下。城遂破。本年事平回任。次年解職進京。二十九年卒。粵中士

民。願請崇祀名宦祠。

華善漢軍正白旗人。一等伯石廷柱之第三子也。初選為豫親王多鐸壻。封和碩額駙。擢為內大臣。康熙十三年逆藩吳三桂耿精忠反。

聖祖仁皇帝特命華善為安南將軍。防守鎮江。十五年改授平寇將軍。駐防江寧。十七年改授定南將軍。駐防湖廣茶陵等處。所至勤慎。事平回京。二十七年疏奏。臣高祖布哈原係蘇完人。姓瓜爾佳氏。明成化間授建州左衛都指揮僉事。臣曾

祖阿爾松阿。嘉靖間承襲父職。至臣祖石翰。移居遼東。臨卒遺命。臣伯父石國柱。石天柱。臣父石廷柱。曰。我雖暫來漢地。然此心依戀故土。未嘗少忘。今病勢已重。恐不能遂我初念。爾兄弟當力成我志。務建功業。以歸本國。其後

太祖高皇帝兵取廣寧。臣伯父國柱。天柱。臣父廷柱。兄弟相商。從父遺命。令臣次伯父天柱先出遠迎。臣伯父國柱。臣父廷柱。開廣寧城門歸順。

太祖皇帝見而喜曰。我國之人。仍歸我國。

特賜御用鞍馬。獎予優渥。自是之後。大兵凡有征討。臣父石廷柱。無不奮勇當先。嘗於

太祖皇帝前。奏稱。臣身係滿洲。願同滿洲甲兵効力。

太宗文皇帝皇知臣父本係滿洲。故命為滿洲甲兵額真。

後又命為總領漢軍固山額真。前後功績。多在滿洲甲兵隊內所得。累蒙

恩擢至一等伯。又一拖沙喇哈番。伏念臣父石廷柱。雖

統漢軍事務。實滿洲係幸逢

聖主洪恩。寵備昔年榮及後嗣。臣父子兄弟。世世感戴。

捐糜難報。復蒙

聖恩。稽考實錄。察取功臣家世名字。臣伯父石國柱。石

天柱。臣父石廷柱。亦預其列。謹將臣家世本末

淵源。實係滿洲。緣由上呈。

睿覽伏祈

宸鑒。施行事下該部。尋議覆。和碩額駙華善等。原係滿

洲。理應將伊同姓人等。俱為滿洲。將佐領一併

歸併滿洲旗下。但查正白旗漢軍旗下。有華善

等五佐領。每一佐領下壯丁四百至九百不等。

通計壯丁三千二百五十二名。內有現任文武官六十五員。候補官并監生五十四員。若將伊等俱歸併滿洲旗下。伊等佐領下另戶壯丁其家人俱係漢人。不便俱為滿洲。且漢軍旗下佐領缺少。應將華善等佐領停其一併歸併滿洲旗下。仍留漢軍旗下。現今滿洲有授為副都統。參領之例。應將華善等同族內外所用現任文武官員。仍留舊任。其陞轉照現行之例。華善等併同族人等。俱係滿洲。嗣後編審冊內。開造滿

洲可也。奏入奉

旨依議三十年

特恩賜雙眼孔雀翎。蓋宗室公爵所戴者也。三十四年病卒。

賜祭一次。鎮江人思其德。建祠立碑祀之。

石琳華善之弟。石廷柱第四子也。初任湖廣分守荆南道。時吳三桂反。逆賊盤踞南漳縣。天門寨等處。同總兵官劉成龍率官兵攻剿。斬殺賊衆。獲馬匹器械等物。康熙二十三年。由浙江布

政使司陞湖廣巡撫二十五年調雲南巡撫值
逆藩吳三桂亂後瘡痍滿野其尤累民者自吳
三桂作亂加賦困民橫征無藝琳斟酌舊制編
定賦役全書進

呈疏言全書上關

國計下係民生奉

旨令詳察細閱有無應行更改增刪明白確議具奏仰
見

聖主愛民爲念四海爲家誠恐沿習既久有不便於民

之處更改增刪爲萬世不易之章程也臣安敢
不兢兢矢慎以仰副

宸衷惟是滇南僻處邊陲禹貢列之要荒之服宋祖棄
諸玉斧之外我

朝定鼎無遠弗届自順治十七年歸入版籍其賦
役大概準明朝之制而因襲之後因吳逆鎮滇
剛愎自用擁兵加賦以致民不堪命今幸

聖政維新重覩天日臣接部咨行司道府會議前來又
採訪輿情考稽舊籍其亟應議減刪除者有八

焉一全滇屯官田畝之糧過重宜減也。按明初沐氏鎮滇。置設衛所。將三分軍為差操。七分軍為屯田。即徵租以養軍。又有名為官田者。給指揮等官為俸食。聽其招佃收租。計官屯田地每畝科租自二斗至四五斗不等。較民賦之每畝三四至五六七八升不等者。則十數倍矣。蓋當年以軍養軍。原非上倉糧米。猶之佃民之納租於田主也。迨我

朝開滇以來。兵威震疊。將明時指揮等官裁為廢弁。軍餘改為編民。其時吳逆暗握邊權。按昔日之租額改為正供之糧額。相沿至今。積逋愈多。每年業將未完。分數職名。疊次冊報。

題參降革罰俸。勒限嚴催。在案。計自康熙二十一年起。至二十六年止。新舊帶徵。共計未完丁折銀六萬二千九百八十餘兩。未完米麥穀豆一十三萬四千五百七十餘石。差檄交催。法盡計窮。究竟完報無幾。豈真官吏罷玩。軍餘抗逋者乎。總緣屯官田地。與民田接壤。相攙其地利高。

下。天時雨澤。人力播種。凡事皆同。而糧賦重輕各異。况雲南原係山土瘠薄之區。刀耕火種之地。較之蘇松膏腴田地。所稱財賦半天下者。額重亦不至此。大為官民交困。今議將新舊裁併。屯賦錢糧。除草場地租。馬場人丁學租。照舊徵收外。其實在田地。照分歸州縣民賦。上則例起科。計實徵銀一萬九千四百九十三兩零。正耗二萬三千七百二十一石零。正耗麥三千四百米一十六石零。應於全書內更改者也。一黑白二井鹽課過重。宜減也。查全滇鹽政考內。鹽井

有九。除阿陋等六井。年該課銀一萬六百四十九兩三錢六分。井小課少。辦納猶易。不議外。查明時黑井額課二萬六千六百餘兩。白井一萬五百餘兩。琅井二千四百餘兩。此辦課之舊額也。自投誠偽總兵官史文。開報黑井課銀九萬六千兩。每斤徵銀一分六釐。白井課銀二萬八千五百六十兩。每斤徵銀八釐。琅井課銀九千六百兩。每斤徵銀六釐。此係明末亂時。額外橫加。較原額不啻數倍矣。滇之竈戶。從井汲滷。始

用錫煎。其柴薪背負肩挑。人力工本。所費既繁。又復加以重課。則竈困矣。行鹽之商。率皆朝謀暮食之人。非若淮浙巨商。挾重資而行運也。且駝運於崇山峻嶺。脚價倍費。豈能損本而賤賣。則鹽價貴。而夷課遂有經時不知鹽味者矣。卽如浙鹽課價。上則每斤不及二釐。下則不及釐許。又如附近之川鹽。每斤只完稅六毫八絲。同一鹽課。何與滇省之課。輕重懸殊若此也。又查山東福建四川貴州廣西等省。雖省分大小不

同。鹽課多寡不一。而滇省僻處天末。環夷褊小之區。不惟不能與小省之課同例。而乃倍多於大省。此滇民之甘心食淡。地方官之不能督銷者。職此故也。今議以黑白二井。照琅井每斤六

釐之例。黑井除減川額外。歲徵銀三萬三千八百四十兩。白井徵銀二萬一千四百二十兩。琅井徵銀九千六百兩。并阿陋等六井。徵銀一萬六百四十九兩三錢六分。共課銀七萬五千五百九兩三錢六分。遇閏加銀六千二百九十二

兩四錢四分零。應於全書內更定者也。一開化府之加糧過重宜減也。按開化僻處萬山界連交岡。獮彘環雜。向隸臨安府轄。九土司中之王弄安南教化三長官司地也。明時分隸蒙自阿迷師宗維摩等州縣。於康熙四年土酋王朝等作叛。吳逆勦平。編爲八里委署臨安知府曹得爵勘丈額田七百五十九頃三十五畝六分零。不照民田科則每畝科米一斗六升三合共科正耗米一萬二千八百石四斗五升三合零。載入全書查通省民糧惟河陽縣上則田每畝徵米八升一合零。爲滇省最重糧額。今開化比河陽又加一倍。昔年未設府以前在蒙自等州縣每畝不過二三升。及改府之後驟加如許。同是此項田地不過改州隸府何致今昔懸殊。彘民苦累。今議將開化府錢糧除人丁條編差發課程商稅等銀照舊徵收外。其原額田酌量改照河陽縣之例共徵本米六千二百一十三石八斗一升二合一勺九抄。每石仍帶耗三升。應於

全書內更改者也。一元江府新增銀米過浮宜減也。按元江舊置土府地處極遠四面環夷種類迥別地皆崎嶇山谷田畝免丈每年認辦米一千九百三十石二斗一升零地畝銀二百二十兩一錢九分零附額徵花斑竹差發二項共銀六百二十一兩一錢七分零商稅銀三十五兩二錢自改建流府編爲六里其時官兵駐防糧運不繼吳逆遂令暫爲設法於額糧之外新增米四千七十石二斗一升零地講銀五千五十三兩二錢三分六釐茶商稅銀一千六十四兩八錢普洱無耗秋米一千八十四石浪媽等六寨地租銀二百八十五兩查元江屢遭殘破之後芟芟子遺何能辦納驟加數倍之糧遂致荒殘愈甚今議將該府^夷種除原額銀米商稅照舊徵解外其新增銀米各減一半實徵新增并原額米共四千五百六十五石二斗二升零地講浪媽并原額差發等銀共四千六百一十兩四錢九分零應於全書內改正者也。一通海

縣夷種及南安州附徵裁併碯嘉縣條編宜減也查通海縣六寨田地五十七頃七十二畝零額徵糧一百六石五斗九升三合每石科銀三兩七錢六分有零較該縣民賦實重三倍夷民困苦難堪今議照新定民例科則實徵銀一百一十二兩六錢二分零米八十三石二斗九升零麥二十三石三斗零以照畫一碯嘉縣原額田四十八頃八十八畝三分零共徵秋糧一百三十石五斗六升四合零每石編銀四兩二錢四分零共徵銀四百三十九兩三錢九分零較全滇之額固屬偏重今既歸南安州附徵應將碯嘉縣條糧照該州每糧一石編銀一兩四分零之例實徵條銀一百七兩六錢七分零米一百三石五斗六升四合零均應於全書內刪改者也一麗江土府失額銀米宜免也查麗江界連吐蕃古稱荒服原額米七百七十四石一斗三升零麥一千六百三十九石五斗六升零地畝銀二百七十五兩三錢五分零外認納條編

銀五百三十兩一錢。後因蒙番出犯將該府所轄金沙江外中甸地方侵佔其中甸等處額徵米一百四石六斗八升零麥四百五十八石五斗一升零已於康熙十年

題豁免徵迨吳逆反叛又將金沙江以內喇普地方割送蒙番該秋糧二百石編銀六十六兩四錢三分久經無徵該土官賠補將來賠累無窮且未便將無地之糧仍載全書況中甸業經免徵則喇普亦應援免今議應於全書內刪除者

也一建水州無藝之徵宜革除查明時設臨元叅將一員將日用等物派諸彝民計歲派村寨年例銀九十二兩及子花檳榔核桃松子木耳乾筍麻子油月柴每年變時價銀二百三十四兩四錢一分零又派馬料八十石一斗零高粱二石原非正供錢糧實係私派橫徵因吳逆搜查投誠知府范應旭呈報邀功遂編入額豈可因仍陋弊今議應於全書內刪豁禁革者也一無徵之場課宜豁也查新平縣明直銀場易

詔

門縣老場銅廠自明至今開採年久今苗斷礦絕商匠逃散課稅無徵官民賠累不堪經臣援具題部議未允但礦廠非同田地有耕有獲錢糧易辦此乃全憑造化有無難必今既銅老山空而課稅不免節年俱係各官捐賠但年復一年焉知不派累小民豈可以賠補之項刊載全書今議將新平之明直場課銀三百三十兩九錢六分遇閏加銀二十七兩五錢八分易門之銅課二兩老場爐課銀二十一兩六錢一併於全書

聖

諭諄諄惟恐一夫不獲其所此正邊境黎民解倒懸內除免者也以上各款如屯賦之太重乃明時之相沿但時異勢殊軍旣為民衛所旣併州縣而壓欠歲積官民交累又如鹽課之過重商竈困於徵輸曩民苦於淡食又如開化之加糧元江之新增乃吳逆邀功橫徵麗江之喇普失額銀米係吳逆割送蒙番以及建水之私派亦係吳逆搜查貽累通海南安二州縣之重糧又新平易門之明直老場荒廢賠課今當更造全書

之日也臣遵

旨會同經管錢糧諸臣再四叅酌敬陳各條恭候

聖裁以垂久永再照石羊等廠歲有額課但苗礦之有無實難期永遠今雖造報似應列入全書仍照舊每年將抽獲之課稅冊報銷尋奉

省捐

旨俱如所奏於是民慶更生其他撫綏善政猶多而此事為最二十八年陞兩廣總督首重學校通飭兩省學官倡率捐俸修葺文教大興水陸鎮營相險設防清除奸宄盜風漸息十九年南海

圖省

順德新會開平香山等縣因里上欺凌籲請設立新圖琳為會題允行三十五年粵省飢饉琳率先捐俸賑濟禁止畧買人口及私抽穀稅彼此遏糴諸弊政并閤香謀陷等惡俗三十九年令總兵官唐光堯等統兵勦瓊州黎人黎首王鎮邦等投誠四十年大水潰決堤岸琳竭力築救水平是年連山瑤人蠢動侵擾州縣朝廷命將軍嵩祝來粵統兵平定琳以逆瑤反側不常當為善後之策因具疏條陳言臣查連州所

轄油嶺等三大排。以及香爐山。大鶯新寨。鍋蓋山。上砵望溪嶺。馬頭鬃各小排。連山所轄軍寨等五大排。以及鷄公背。牛路水。八百粟。天堂。冷水冲。龍水尾山。猪豹嶺尾寨。新寨。大坪。魚寨。冲六對。冲大坪。冲水甕尾。茅田。冲各小排。周圍約計四百餘里。俱係崇山峻嶺。鳥道羊腸。於中難以建設縣治。如連州之油嶺。行祥。橫坑。三排。皆距州城約四五十里。連山之軍寮排。距縣城二十餘里。馬箭排。亦距縣城二十餘里。火燒坪排。距縣城二十里。大掌嶺排。距縣城十里。八崗排。距縣城約二十里。向來就近分管。今若割而為一。鞭腹尤長。即添設縣令。一時未諳徭情。不無顧此失彼。計其田地共稅五十三頃二十一畝。零。官民夏米一百五十二石二斗零。餉銀二百三十八兩三錢七分零。丁口銀一十五兩四錢五分零。皆在全書原額地畝丁口之內。如連山五排稅畝。據縣申稱。係徭戶買受民間田地。與民一例徵輸。尤非徭排境內地土。若另設一縣。

錢糧為數無多不敷一邑俸工等項之用臣等
管見莫若仍歸連州連山管轄惟請於附近徭
排適中地方之三江口建立寨城安設官兵統
率控馭查有廣州府海防督捕同知劉有成實
心任事敷政宜民上年十月隨師赴連復委兼
攝連山縣事稔知徭地續又入排撫諭熟識徭
情以之文兼武備管領把總一員兵丁一百名
為理徭同知駐於三江口不時入排巡察化導
宣講

聖諭一十六條使知孝悌禮義恪遵

國法各務本業以杜非為然廣府距連千有餘里
該同知所屬十七州縣海防督捕事務不能兼
管請將連州陽山連山三州縣捕務仍歸該同
知就近管理其番禺東莞龍門增城從化新安
花縣七縣海防督捕議歸廣州理事同知佟銘
管理南海順德香山新會新寧三水清遠七縣
海防督捕議歸廣州通判蔣宗瑜管理綠廣州
地方襟山帶海盜賊易於潛藏俾各員分管以

專責成是官不另設而任使各得其宜矣再查連州原設有連陽一營額兵六百八十二名遊擊統領分防連州陽山連山三州各處汛守不能兼顧猺排今須三江口添設一協居中彈壓仍分撥官兵於各排要口之鐵坑長塘大拱橋等處嚴加防範臣等會高提臣殷化行將韶協裁去所存官兵改歸三江因韶協與右翼鎮同駐韶州分防韶屬各縣以及廣屬之清遠連陽花縣等汛今韶協議裁而該協原防各汛統歸於右翼鎮標防守查該鎮有貼防花縣汛兵三百五十三名高灘汛兵二百八十名俱應歸還鎮標以便派防韶協原管各汛其高灘汛守歸之連陽營花縣汛守歸之廣州鎮協又查始興營設有守備一員千總一員把總一員額兵一百七十五名屬南雄協所轄駐劄始興縣城并分防始興江口查南雄協駐劄府城止分防保昌縣各汛則始興營相應裁去官兵歸於三江口新協其始興汛守統歸於南雄協派防袁益

通融均屬妥便。第韶協原設額兵九百二十三
名。始興營額兵一百七十五名。共兵一千零九
十八名。今雖改歸三江。不敷防範。除左右二翼
鎮及廣州協南雄協連陽營已議添防。汎守不
派外。應於廣東將軍督撫提鎮各標協營馬步
守兵之內。均勻派出一千零二名。內將九百零
二名。歸於新協。共合二千之數。其餘一百名。歸
於同知管束。但恐冰出各兵。未知徭徑。應令各
標協營。照依所派之數。汰除老弱。將名糧移歸

新協。就於連陽鄉勇中。考驗人力強壯。技藝嫻
熟者。頂補。因鄉勇即係該地居民。素識排內情
形。平時各守村庄。防範徭人。若募之入伍。是使
益加奮勵。而汎守倍嚴矣。今三江新協。既議設
兵二千名。應設中軍都司一員。守備二員。千總
四員。把總八員。除韶協都司一員。守備一員。千
總二員。把總四員。始興營守備一員。千總一員。
把總一員。改歸新協。尚應添千總一員。把總三
員。分為左右二營。令新協統率。該協仍兼轄連

陽營統隸督提管轄。其新協副將員缺。查有春江協副將錢嘉。弓馬雖屬平常。然能整肅行伍。訓練士卒。自上年十一月。委署韶協事務。防範維嚴。且又入排撫諭。深悉徭情。以之調補新協副將。實屬人地相宜。可收指臂之效。此副將錢嘉。同知劉有成。如三年之中。果能交相砥礪。潔已奉公。興行教化。訓練弁兵。地方安堵。民徭樂業。臣等稽其事實。照福建臺灣之例。保題。應否即陞。是出。

睿裁伏乞

勅部議覆施行。下部議。悉如所請。自是無復寇奪商民

晏然。四十二年辛

予祭葬如典禮。粵人思其功德。崇祀名宦祠。

石文晟。石琳長兄。二等待衛。綽爾們之長子也。由監生通籍。康熙三十年。任山西平陽府知府。值歲奇荒。文晟刻狀請賑。躬設粥廠。以食餓者。遠地不能就食者。親為按視。戶給升合。饑民得延殘喘。會禹門造船。河南運米。上司檄平陽協。

濟所費不貲。民困已蘓。次年大同養馬。派運穀草三十五萬束。文晟慨然曰。民不堪命矣。遂馳謁當事。泣陳平屬偏苦狀。聞者動容。事乃得罷。馬賑荒免草兩詳文。傳布民間。至今感之。尋陞雲南貴州布政使司。三十三年陞雲南巡撫。三十七年請定元江開化廣南廣西四府。照粵西烟瘴地例。於滇省郡縣中選擇廉能素著熟悉風土者調補。又請分別三逆及孫延齡屬下脫逃人員。將情罪可惡法不容恕者指名嚴拿。其餘悉令免緝。偽標下士卒在逃者已免查拿。其歸順者令墾地輸糧。子弟准一體應試。人心大安。又請改北勝州為永北府。管攝土司。舊順州地方裁屬鶴慶管轄。相去甚遠。亦改歸永北府。四十三年調廣東巡撫。一切錢糧火耗折色米價雜項差徭。及派取芽茶白蠟等弊。通行各府州縣。盡行革除。嚴禁屬員餽送。以儉官方。平時作興文教。遇鄉試核減卷價。優恤士子。招撫山蠻巨寇。地方寧謐。黎民樂業。尋陞湖廣總督。廣

東人思其德崇祀名宦祠。

石文炳一等伯石廷柱第三子和碩額駙華善之長子也。順治十八年石廷柱卒。文炳以孫承襲伯爵。康熙十二年補授叅領。十三年授直隸援勦總兵官。十七年補正定總兵官。二十一年擢副都統。駐防杭州。二十三年陞正白旗漢軍都統。二十八年任福州將軍。居官鎮靜。整飭旗員訓練甲士。號令嚴肅。旗丁無敢恃強。旬奪生事擾民者。閭井悅服。三十三年復補正白旗漢

軍都統。赴京師道卒。閩人為祠祀之。

于時躍漢軍正白旗人。初任部曹。累官至陝西按察使。聽訟明允。迅速。案無留牘。訟畢即行遣歸。百姓稱之曰于不落店。秦俗稱健訟人為銳頭者。多抗撓不法。從前理訟者畏其健。常寬縱之。時躍力矯其弊。以為寬比而坐民。非法也。犯即坐之。疆者股栗。全秦官吏相戒無犯法。差徭租賦悉為輕減。十二年陞廣西巡撫。十三年遣官兵擒斬賊渠偽義寧伯龍韜。十五年偽晉王

李定國。遣其將閔維龍、曹延生等攻陷橫州。防守都司趙連城以官兵衆寡不敵，退屯貴縣。時躍遺兵會同總兵官馬雄兵馳援，賊棄城遁去。遂恢復橫州，俘斬甚衆，得

旨嘉獎。十八年以功加右都御史銜，旋陞廣西總督。卒。

後崇祀陝西名宦祠。

李士正，漢軍正白旗人。初由京職外轉，至浙江布政使，解任歸京師。康熙二十年

特授江西巡撫。是年冬調廣東巡撫。時廣東初設八旗

駐防，猶襲平藩餘習。士正經營措置，撫輯勞來，俾兵民分域寧居。次第復業，平時正已率屬體恤輿情，嚴捕尅盜，訪察奸頑，修葺層樓以資守望。時花山積盜年久未淨，特請設治立伍，以奠巖疆。疏言廣東花山一帶地方為番禺、南海、三水、清遠、從化、英德、增城等縣錯壤交界之所，綿亘五百餘里，久為藏奸之藪。自逆藩尚之信僭竊，以後擅立王庄，名色分佈，黨徒佔踞田土，因有本地奸人憑依附和聚為盜賊，劫掠公行，莫

敢過問當逆藩伏法時幾至交結為亂後經前
撫臣金^傷與提督臣侯襲爵遣兵進勦先已報
明但緣此地係深山疊嶂茂箐密林潛藏叵測
積有年所勦則逃遯而踪跡難追撫為故事而
間或復合以致根株未能盡淨迄今仍復竊發
擬番禺縣里排胡承璉等呈開賊首雖已就擒
餘孽仍肆荼毒現今賊夥黃盛和江伯興等見
往車頭整屋源水柴山等處招集亡命謀作非
為呈懇速調防守又據士民黃士龍等條陳謂
花山地方迤邐其間地名有車頭整曹洞沙帽
嶺屋源水正逕鍾村沙規三扶田黃竹湖塘鋪
等處率皆萬山重疊路逕險僻自古及今積賊
難除若圖淨盡根株必須專設縣治佐以師旅
於適中之處控制要害庶為久安等_因臣思花
山為粵省廣州府之靠山相距不滿百里而山
之西北南三面又為官民商賈孔道圍繞而行
五百餘里數十年來劫掠不時行旅避之百姓
畏之因即會商督臣吳興祚提臣侯襲爵選委

驛鹽道僉事李毓棟廉州府同知李文獻臣標
右營遊擊岳彩鳳帶領効用各官標營兵丁乘
此農隙之時前去萬山之中相度形勢要害山
口或兵百名或五六十名劄駐又通行環山七
縣印捕各官從頭清查編立保甲其中查有賊
盜之徒頑野之輩或緝拿法治或甲長收管或
安插食糧則一時盜賊消弭而地方得以寧謐
但善後久安之策誠如番禺縣士民之條陳必
需專設縣治於適中之地控制要害且其山遼
曠深遠水土肥餘饒割數縣逋糧之地招山野愚
頑之人建城而守設官而治久安長治之道莫
善於此併設營汛約官兵八百餘名以遊擊領
之協同彈壓則道路漸闢荒山漸墾人烟漸多
戶口漸增盜賊自漸息矣且花山逼近省城自
此省會重地可保無虞周圍沿山大路商賈行
旅可無戒心嶺南一帶長得廓清矣此臣一得
之愚為地方起見如蒙

俞允當此軍需殷繁之日錢糧亦不取之公家其城垣

止需土築藉周圍各縣之民力可成其城樓塚
口宮室廟貌營房議於本省開照各項捐納事
例一年不煩別措而功可成矣臣謹會同兩廣
督臣吳興祚等合詞密

題伏乞

勅下該部查照議覆施行尋經部臣覆准設立花縣粵
地以安又以兵燹後文風丕振創貢院修學宮
多方訓迪士習翕然改觀二十六年回京廣東
人思其德歿後崇祀名宦祠

宜思恭漢軍正白旗人初任湖廣茶陵縣知縣
苞苴不入囹圄常空清欺隱革橫派葺學校建
義館累陞江蘇布政使緣事革職康熙五十七
年起補河南布政使十一月擢廣西巡撫五十
九年卒於官

賜祭一次祭文稱其性行純良才能稱職服官年久素
有勤勞云茶陵人思其德崇祀名宦祠

楊文乾漢軍正白旗人湖廣總督楊宗仁子也
康熙五十三年任山東曹州知州性英敏人莫

能欺遇事明決抑豪強扶良善每朔望令鄉約
宣講

聖諭復親為勸誡徵收錢糧催科有法人皆急公聽訟
獄案牘立具無稍留滯焉倡議捐貲重修文廟
堂陛煥然曹地高下相間遇有大水民多患之
疏濬引河歸入賈魯舊河水患無虞累遷至廣
東巡撫卒於官曹州士民崇祀名宦祠



